

338* *Copia di un capitolo di una lettera scritta per sier Zorzi Tarona da Lepanto de di 28, mazo, mandata de qui a sier Francesco Tarona suo fiol traduta di Greco in latin ad litteram ut supra.*

Da novo sapiate che da più bande et da spioni, i quali havemo et veneno ogni zorno, tutti dixeno come el Turcho el vien con la sua persona per terra a Napoli con l'exercito di la Natolia et l'armada per mar, hanno statuido con Amar bei di vegnir qui con l'exercito di la Romania, el qual et da i signal cussi dimostrano, perhò che Amar bei è el flamburaro de la Morea, et el Faym bassà anche l'altro zorno se messe in camin de andar suso, et caminano 10 mia et mancho: per tanto se 'l fusse de andar a Rhodi, over altrove lontano, el serave andato de avril, et se caminarave altramente, ma questo è palexe che non è da far lontan viazo: ha messo, et tagliano al despotato con gran presteza 10 milia lanze, et queste non è per Rhodi. In questo zorno è venuto un homo da Constantinopoli, mancha da zorni 15, et dixè da novo: come i exerciti de la Romania se asunano a la Chipsala, et i exerciti di la Natolia sono venuti da l'altra banda a l'incontro de Galipoli, lo qual è segnal come de qui el guardano. L'armada è in punto, e non aspetava salvo homeni da remo, i qual hanno scontrado molti homeni da remo apresso Constantinopoli, et infina ozi zorno serano tutti li; pertanto nui zudegemo, secondo vedemo i segnali, che de queste bande el se vede, et roman a la speranza de Dio de ajutarne. A di 28 mazo in Lepanto.

Soneto fato in questi tempi contra frati quali doveriano andar in armada.

Fratochi da la schena prosperosa
Soto el vexil di Christo militanti,
In processiom vedendovi galanti
Zoveni e lieti con faza animosa.

A me parebbe pur licita cosa
Per far andar la fede nostra avanti,
Che vui pigliaste l'arme tutti quanti
Contra gente infidel vituperosa.

Ma l'otio la libido e la golaza
Le piume il sono e l' inertia poltrona
Vi fa schifar la divota coraza.

Unde mormorar sento el ver sona
Chiaro de voi in ziascaduna piazza,
Il ver che con ragion molto consona.

Adunque la persona
Movete hor su contra turchi infideli
Acciò che non siate a Dio ribeli.

Dil mexe di lujo 1499.

339

A di primo lujo. In collegio. Intrò sier Domenego Marin, et sier Marco Antonio Morexini el cavalier savii dil consejo, et sier Alvixe da Molin savio di terra ferma, et fo butà un cao di XL, in loco di consejer manchava, tochè a sier Giacomo Marcello.

Vene l'orator d'Urbini, et dimandò el suo signor voria menar 20 balestrieri a cavallo in luogo di 20 homeni d'arme, sichè verà a tenir 80 homeni d'arme et 20 balestrieri, et aricordò li fanti stati in Bibiena fusseno satisfati. *Item*, che di la provision dil signor suo havesse ogni tre mexi la rata, ch'è ducati 3000. Risposto si consejeria; et la prima li fu fatta.

Venendo oratori di la comunità di Verona misier Andrea di Pelegrin dotor et misier Ogniben di Bra, exponendo per nome di quella fidelissima comunità: che havendo nel suo consejo posto parte le done non portaseno più veste d'oro ni de arzeno ni vesture, era sta messo certe polize *publice* che diceva mal dil consejo, et mostrono una poliza in la qual si conteniva *bechi fotui* non vardè a tutto, et poi contra quel Justo de Justi, che suo padre fo impichà, et lui sarà, et altre simile ignominiose parole. Pertanto richiedeno sia mandato li uno cao dil consejo di X, over avogador a far inquisition, et punir chi se troverà sarà stato. Et andati fuora, sier Filippo Trum procurator parlò contra di certo edito fato li di quelli andavano al presente, da poi fato la liga, con abiti francesi, *ergo* etc., *tandem* fo terminato mandarli uno avogador suso, et cussi d'acordo andoe sier Nicolò Michiel dotor et cavalier.

Vene sier Alvixe Contarini q. sier Ferigo, dicendo esser sta retenuti di uno gripo a Zara certi turchi merchadanti quali andavano a Ragusi; pertanto, pregava la Signoria li fazi restituir, acciò el Signor non fazi retenir i nostri merchadanti sono a Constantinopoli et altrove, atento mai per guerra el Turcho habi tenuto nostri merchadanti; et fo risposto si vederia.

Da Feltre, di sier Mathio Barbaro podestà et capitano, di ultimo zugno. Come havia che misier